

qui vous honorons, & qui souhaittons embrasser ce que vous enseignez. J'ay des ja entendu quelque chose de vostre creance, dist leur Capitaine, Iesus m'a guery d'une maladie qui m'alloit porter au tombeau. Vn Sauvage de Saint Ioseph proche de Kebec, s'estant trouué avec moy il y a deux ans, m'enseigna qu'il falloit auoir recours à luy dans nos besoins; qu'il estoit bon, & qu'il estoit tout-puissant. Me voyant donc à deux doigts de la mort, ie le priay de m'assister, il me guery; & ceux qui estoient frappez du mesme mal que moy, & qui ne l'inuoquerent pas, en moururent. Si on pouuoit dresser vne petite maison à Tadoussac, comme i'ay dit, tous les reliquats de ces petites Nations qui sont dans les terres, se viendroient là faire instruire, & le commerce des François n'en seroit que meilleur.

Or iacoit qu'on ne puisse pas bien aisément instruire ny recueillir les Sauvages sans ce petit accommodement, le Pere ne laissa pas neantmoins de les inuiter à se trouuer tous les ans à Tadoussac: & pour mieux garder la coustume de ces peuples, il mit vn present entre les mains d'vn Chrestien, pour estre fait au nom de tous